


Ni Presidente Thomas S. Monson



# Surotenyo dagiti Propeta

**N**agserbiak iti United States Navy agingga iti gibus ti Maikadua a Gubat iti Lubong. Maysaak a seaman, ti kababaan a mabalin a ranggo iti navy. Kalpasanna nagbalinak a kualipikado nga agbalin a Seaman First Class, kalpasanna nakualipikadoak nga agbalin a Yeoman Third Class.

Naggibus ti Maikadua a Gubat ti Lubong, ket idi agangay nagikkatak. Ngem inkeddengko a no agsubliak iti military, kayatko ti agserbi a kas maysa a commissioned officer. Napanunotko, “Diakon agluto iti kusina, diakon agkuskos iti kubierta, no maliklikak daytoy.”

Kalpasan a nagikkatak, kimmappengak iti United States Naval Reserve. Nagsanayak iti tunggal rabii ti Lunes. Nagadalak a nasayaat tapno makualipikadoak iti akademia. Innalak ti amin a klase ti eksamen a napanunotko: mainaig iti panunot, bagi, ken rikna. Kamaudiananna, dimteng ti napintas a damag: “Naawatka nga umawat iti appointment ti maysa a wagayway iti United States Naval Reserve.”

Siraragsak nga impakitak daytoy iti asawak, ni Frances, ket kinunak, “Naawatak! Naawatak!” Inarakupnak ket kinunana, “Inkarigatam ti nagbannog tapno magun-odmo daytoy.”

Ngem kalpasanna maysa a banag ti napasamak. Naawaganak nga agbalin a mammagbaga iti bishopric ti wardko. Naaramid ti bishop’s council meeting iti dayta met la a rabii ti navy drill meetingko. Ammok nga adda dakkel

a parikut. Ammok nga awan ti panawenko a mangipatungpal iti Naval Reserve *ken* dagiti pagrebbengak iti bishopric. Ania ti nasken nga aramidek. Nasken nga agdesisionak.

Inkararagak daytoy. Kalpasanna nakipagkitaak iti tao nga stake presidentko idi ubingak, ni Elder Harold B. Lee (1899–1973), ti Korum dagiti Sangapulo-ket-dua nga Apostol idi. Nagsinnangakokami iti tugaw iti lamisaan. Imbagak kenkuana no kasano ti kapateg kaniak dayta nga appointment. Kinapudnona, impakitak ti kopia ti surat ti appointment a naawatko.

Kalpasan ti panangutobna iti banag iti apagkanito, kinunana kaniak, “Daytoy ti nasken nga aramidem, Brother Monson. Suratam ti Bureau of Naval Affairs ket ibagam kadakuada a gapu iti awagmo kas miembro ti bishopric, saanmo a maawat dayta nga appointment iti United States Naval Reserve.”

Nagladingitak. Innayonna, “Kalpasanna suratam ti commandant ti Twelfth Naval District iti San Francisco ket ibagam kadakuada a kayatmo ti agikkat iti dayta a buyot.”

Kinunak, “Elder Lee, dimo maawatan ti military. Siempre agkedkeddanto nga ited kaniak dayta nga appointment no agkedkedak nga umawat iti daytoy, ngem dinto ipalubos ti Twelfth Naval District a palusposandak. Gapu iti gubat a mapasasamak iti Korea, awan duadua a maawaganto ti saan a nadutokan nga opisial. No agsubli a maawagan, kaykatko ti agsubli kas maysa a commissioned officer, ngem diakto maaramid no diak awaten daytoy

nga appointment. Siguradoka kadi a daytoy ti balakad a kayatmo nga awatek?”

Sinallabaynak ni Elder Lee ket kinunana a kasla ama kaniak, “Brother Monson, padakkelem ta pammatim. Saan a para kenka ti military.”

Nagawidak. Insublik ti natedtedan iti lua nga appointmentko iti sobre a karagpin ti surat ken nagkedkedak nga awaten daytoy. Kalpasanna sinuratak ti Twelfth Naval District ket kiniddawko nga agikkatak iti Naval Reserve.

Ti panagikkatko iti Naval Reserve ket iti kaudian a grupo a nagtuloy sakbay ti panangrugi ti Gubat iti Korea. Naaruatko ti kawesko iti kuartel. Innem a lawas kalpasan a naawaganak nga agbalin a mammagbaga iti bishopric, naawaganak nga agbalin a bishop iti wardko.

Diak koma naaddaan iti saad iti Simbaan ita no diak sinurot ti balakad ti maysa a propeta, no diak inkararagan dayta a desision, diak koma nabigbig ti pateg ti maysa a napateg a kinapudno: ti sirib ti Dios no dadduma kasla kinamaag kadagiti tao.<sup>1</sup> Ngem ti kadakkelan a maysa a leksion a mabalintayo a sursuruen iti mortalidad ket no agsasao ti Dios ket agtungtungpal dagiti annakna, kanyonto nga agbalinda a nasayaat.

Nakuna a ti pakasaritaan ket kasla babassit a panggeddeng, ket kasta met ti maaramid iti biagtayo. Dagiti desisiontayo ti manggeddeng iti pagtungpalantayo. Ngem saantayo nga agmaymaysa kadagiti desisiontayo.

No kayatyo a makita ti lawag ti langit, no kayatyo a mariknan ti pammaregta ti Mannakabalin a Dios, no kayatyo ti maaddaan iti dayta a rikna iti kaungganyo a ti Nailangitan nga Amayo tartarabayennakayo, ngarud surottenyo dagiti propeta ti Dios. No surottenyo dagiti propeta, addakayto iti natalged a lugar.

#### **NAGADAWAN**

1. Kitaen iti 1 Taqa Corinto 2:14.

### **PANANGISURO MANIPUD ITI DAYTOY A MENSAHE**

Manmano dagiti miembro ti Simbaan ti saggay-santo nga umawat iti balakad manipud iti maysa nga Apostol, kas iti inaramid ni Presidente Monson. Ngem maparaburantayo latta no surotentayo dagiti pannursuro dagiti propeta ken apostol. Basaenyo dagiti bitla ni Presidente Monson manipud iti kaudian nga isyu ti komperensia (laglagipen pay dagiti panglukat ken pangrikep a mensahena). Sapulenyoy dagiti nalawag

a pangiturong ken awag nga agtignay wenno agaramid. Mabalinyo nga ilawlawag no ania ti nasursuroyo kadagiti sarungkaranyo ket panunotenyo dagiti wagas a pakayaplikaran ti balakad ni Presidente Monson.

## **AGTUTUBO**

### **Balakad para kadagiti Narigat a Pili**

Mbaga ni Presidente Henry B. Eyring, Umuna a Mamagbaga iti Umuna a Panguluen, maipapan iti maysa a panawen idi sinurotna ti balakad ti propeta. Kabayatan ti maysa a sapasap a komperensia, ginutugot ni Presidente Ezra Taft Benson (1899–1994) dagiti miembro a liklikanda ti agutang—nangnangruna ti utang iti panagisalda.

Kinuna ni Presidente Eyring: “Inasitgak ti asawak kalpasan ti miting ket sinaludsodko, ‘Panagkunam kadi nga adda ngata wagas a pakaaramidanta iti dayta?’ Idi damo saanmi a kabaelan.” Ngem iti dayta a rabii napanunotna ti maysa a sanikua a pinadasda nga inlako ngem dida nagballigi iti sumagmamano a tawen. “Nagtalekkami iti Dios ken . . . ti mensahe ti katulonganna, [ngarud] timmawagkami iti telepono. . . . Nangngegko ti maysa a sungbat nga uray iti daytoy nga aldaw napapigsa ti panagtalekko iti Dios ken kadagiti katulonganna.” Iti dayta met la nga aldaw nangidiaya ti maysa a lalaki iti sanikua dagiti Eyring iti kantidad a dakdakkal ngem iti panangisaldada. Nabiit kalpasanna nagbalin a nawaya dagiti Eyring iti panagutang (kitaen iti “Trust in God, Then Go and Do,” *Liahona*, Nob. 2010, 72–73).

Mabalin nga awanankayo iti naisalda a bayadan, ngem matulongannakayo ti balakad ti propeta ditoy ken ita babaen dagiti narigat a panggeddeng maipanggep iti trabaho, edukasion, mision, ken panakisinnarak wenno dating. Paglilinnawaganyo iti familiayo wenno kapatadayo maipapan no kasano a masurotyo ti propeta no nasken nga agaramidkayo kadagiti panggeddeng.

© 2015 ti Intellectual Reserve, Inc. Nailatang amin a karbengan. Naimaldit iti EUA. Pannakaanamongna iti Ingles: 6/14. Pannakaanamongna a maipatarus: 6/14. Pannakaipatarus ti *First Presidency Message, January 2015*. Ilokano. 12581 864



Pammati • Pamilia • Tulong

# Dagiti Kababalin ni Jesucristo: Managtungpal nga Anak

*Nainkararagan nga adalenyo daytoy a material ken kalikagumanyo nga ammuen no ania ti ibinglayyo. Kasano a ti pannakaawatyo iti biag ken mision ti Mangisalak ket mangpapisga iti pammatiyo Kenkuana ken mangparabur kadagiti ay-aywananyo babaen ti visiting teaching? Para iti ad-adu pay nga impormasion, mapan iti [reliefsociety.lds.org](http://reliefsociety.lds.org).*

*Daytoy ti paset ti maysa a serye dagiti Mensahe iti Visiting Teaching a mangitampok kadagiti kababalin ti Mangisalak.*

**T**i panangsuot iti pagwadan ni Jesucristo maipapan iti panagtungpal ket mangpadakkel iti pammatitayo Kenkuana. “Nakaskasdaaw kadi,” kinuna ni Elder Jeffrey R. Holland ti Korum dagiti Sangapulo-ket-dua nga Apostol, “a pilien ni Cristo ti umuna ken kangrunaan tapno mailawlawag iti bagina maipapan iti pakainaganna iti amana—nga ay-ayatenna ken tungtungpalenna isuna ken agtulnog kenkuana kas maysa a napudno nga anakna? . . . Panagtungpal ti umuna a paglintegan ti langit.”<sup>1</sup>

Isuro dagiti nasantuan a kasuratan “Ket no makagun-odtayo iti ania man a bendision manipud iti Dios, babaen ti panagtulnog iti daya a paglintegan a naibatay.” (DkK 130:21). Naespirituan a dumur-astayo bayat ti yaasidegtayo iti Dios babaen ti panagtungpal ken yaawistayo iti bileg ti Pannubbot ti Mangisalak iti biagtayo.

“Bayat ti panagtungpaltayo kadagiti pagbatayan ken bilin ti ebanghelio ni Jesucristo,” kinuna ni Elder D. Todd Christofferson ti Korum dagiti Sangapulo-ket dua nga Apostol, “sagrapentayo ti agtultuloy a pannakaibukbok dagiti bendision nga inkari ni Dios iti pannakitulagna kadatayo. Mangted dagita a bendision kadagiti pamataudan a kasapulantayo nga agtignay imbes nga agpannuraytayo bayat ti panagbiagtayo. . . . Ti panagtungpaltayo ket mangted iti dakdakkel a panangkontrol iti biagtayo, dakdakkel a kabaelan nga agtignay, nga agrabaho ken agparnuay.”<sup>2</sup>

## ***Dagiti it Mainayon a Nasantuan a Kasuratan***

Lucas 22:41–46; Doktrina ken Katulagan 82:10; 93:28

## ***Manipud kadagiti Nasantuan a Kasuratan***

“Maited kadi iti sabali a tao ti naespirituan a pigsa a resulta ti agtultuloy a panagtungpal kadagiti bilin?” sinaludsod ni Elder

David A. Bednar ti Korum dagiti Sangapulo-ket-dua nga Apostol. “Ti nalawag a sungbat . . . ket saan.”<sup>3</sup>

Ti pangngarig maipapan ti sangapulo a babbalasang ket maysa a pagarigan daytoy a pagbatayan. Idinto nga innala dagiti amin a babbalasang dagiti pagsilawanda tapno “sumabet iti asawa a lalaki,” lima laeng dagiti manakem a nangikuyog iti lana kadagiti pagsilawanda. Naampang dagiti daduma pay a lima gapu ta “saanda a nagikuyog iti lana.”

Kalpasanna dimteng ti maysa a pukkaw iti tengnga ti rabii: “Adtoy ti nobio, rummuarkayo a sumabet kenkuana.” Tinarimaan ti amin a babbalasang dagiti pagsilawanda, ngem awan ti lana dagiti naampang a babbalasang. Kinunada kadagiti manakem a babbalasang, “Ikkandakami iti lanayo, ta dagiti pagsilawanmi maiddepdan.”

Insungbat dagiti manakem a babbalasang, “Tapno di agkurang ti maipaay kadakami ken kadakayo: inkayo . . . ket

gumatangkayo ti maipaay kada-  
kayo.” Ket bayat ti kaawan dagiti  
naampang a babbalasang, dimteng  
ti nobio ket simrek dagiti manakem  
a babbalasang ket kimmuyogda  
kenkuanan ket “nailiktub ti  
ruangan”

(Mateo 25:1–113).

#### **DAGITI NAGADAWAN**

1. Jeffrey R. Holland, “The Will of the Father in All Things” (Brigham Young University devotional, Ene. 17, 1989), 4, *speeches.byu.edu*.
2. D. Todd Christofferson, “The Power of Covenants,” *Liahona*, Mayo 2009, 21.
3. David A. Bednar, “Converted unto the Lord,” *Liahona*, Nob. 2012, 109.

### ***Ibilang Daytoy***

Ania dagiti sumagmamano a  
pagarigan ti panagtungpal kadagiti  
nasantuan a kasuratan?

© 2015 ti Intellectual Reserve, Inc.  
Nailatang amin a karbengan. Naimaldit iti  
EUA. Pannakaanamongna iti Ingles: 6/14.  
Pannakaanamongna a maipatarus: 6/14.  
Pannakaipatarus ti *Visiting Teaching Message*,  
*January 2015*. Ilokano. 12581 864